

Акафист святому великомученику Мине

Кондак 1

Возбранный чудотворче и в скорбех скорый помощниче, святыи великомучениче Мино: хвалебныя песни от сердца приносим ти недостойнии; ты же, яко имеяи дерзновение ко Господу, от всяких бед сохрани зовущия Ти: Радуйся, Мино, мучениче многострадальный.

Икос 1

Ангел во плоти на земли явился еси, Мино преславне, слово бо Христово душею чистою прием в пустыню, идольскаго нечестия бегая, удалился еси, идеже яко бесплотен Богови послужил еси: мы же чудное житие твое поминающе, с радостию поем Ти: Радуйся, Церкви Христовы звездо пресветлая; Радуйся, солнца Правды луче благодатный. Радуйся, светильниче святыи, житием твоим верныя просвещающий; Радуйся, заповедей Божиих исполнению научающий. Радуйся, правоверным, благочестия христианскаго образ являющий; Радуйся, к свету Христову заблудшия наставляющий. Радуйся, неправомыслящих вразумление; Радуйся, сребролюбивых сердец исправление. Радуйся, миром духовным, души наша улаждающий; Радуйся, в печалех присно нас утешающий. Радуйся, скорое от бед избавление; Радуйся, злых помыслов наших отгнание. Радуйся, Мино, мучениче многострадальный.

Кондак 2

Видяще господство многобожия языческаго, во граде твоём, Мино всеславне, душею праведною томился еси; посреде же тьмы греховныя, яко светило, житием добродетельным сияюще, пел еси непрестанно Господеви: Аллилуиа.

Икос 2

Разум просвещен, заповедей Божиих исполнением имея, страсотерпче Христов, непорочно житие твое, посреде людей беззаконных проводил еси, день и ночь Господеви служаще любовию, мы же укрепльшаго тя Бога славяще от сердца зовем ти сицевая: Радуйся, упованию христианскому верныя научающий; Радуйся, козни вражия предстательством твоим разрушающий. Радуйся, сладостию молитв твоих скорбн наша растворяющий; Радуйся, в дивнем житии твоём унылыя мужества питием напаяющий. Радуйся, заповедей Господних блюстителю верный; Радуйся, благочестия и веры православныя ревнителю твердый. Радуйся, чтущия тя любовию, покрывающий; Радуйся, во искушениях, присно нам помогающий. Радуйся, мира духовнаго

мироварнице славная; Радуйся, сосуде честный, благодатию преисполненный. Радуйся, токами чудес твоих правоверный; Радуйся, язвы душ наших, елеем молитв твоих умащающий. Радуйся, Мино, мучениче многострадальный.

Кондак 3

Силою Божию наставляем, славу мирскую и честь воинскую, Христа ради оставил еси и в пустынях, и горах Господеви послужити изволил еси, яко Ангел непрестанно Богу зовя: Аллилуиа.

Икос 3

Имуще сердце ревностию о славе Божественной распяемому, со дерзновением пред нечестивым князем предстал еси, многострадальниче Христов, безумие идольское обличающе; он же яростию распяем и не терпяще слов благодати, из уст твоих исходящих на муки многия предаде тя, мы же поминающе подвиг исповедания твоего с любовию зовем ти таковая: Радуйся, тернием от рук незаконных израненный; Радуйся, исповедания ради огнем опаляемый. Радуйся, рассечение удов твоих претерпевый; Радуйся, тело твое иглами острыми исколотое имевый. Радуйся, млатом во главу люте ударяемый; Радуйся, многия раны Христа ради приемый. Радуйся, от трапезы подвиг твоих, мужеством верных насыщающий; Радуйся, во искушениях терпению нас научающий. Радуйся, страданиями твоими многия ко Христу обративый; Радуйся, мучителей твердостию веры твоя победивый. Радуйся, в подвиге твоем образ крепости духовных явивый; Радуйся, суету идольскаго нечестия посрамивый. Радуйся, Мино, мучениче многострадальный.

Кондак 4

Бури гонения на Церковь Христову прошедше во дни Константина Великаго, воздвигоша христиане во Александрии церковь в честь славнаго имени твоего, Мино всечестне, идеже и положиша честныя мощи твоя, имже и мы ныне поклоняющесе поем дивному во святых Богу: Аллилуиа.

Икос 4

Слыша о подвиге исповедания твоего, мучениче славне, любовию теплою воспеваем тя и прославляюще дивное терпение твое, со умилением песни приносим ти сщевыя: Радуйся, нищету нашу верою обогащающий; Радуйся, милостивое предстательство твое верным являющий. Радуйся, сокровище мира духовнаго нам открывающий; Радуйся, грады и веси в них же имя твое почитается, покрывающий. Радуйся, домов христианских от огненного запаления охранителю; Радуйся, неправедно страждущих утешителю. Радуйся,

путешествующих добрый путеводителю; Радуйся, в море плавающих безбедное прохождение. Радуйся, от внезапной смерти верных избавляющий; Радуйся, скорбящих предстателю благодатный. Радуйся, присно в печалех нам помогающий; Радуйся, молитвами твоими скорби наша на радость прелагающий. Радуйся, Мино, мучениче многострадальный.

Кондак 5

Боготечною звездою прошел еси житие твое, Мино всехвальне, день и ночь Господеви любовь пламенную работающе; темже и на конец подвигом мученическим веру твою запечатлел еси и венец нетленных славы от Бога прием, на небесех с лики святых поеши Ему: Аллилуиа.

Икос 5

Видяще скорби и болезни наша, Мино блаженне, о нас, пред Престолом Господним предстоя ходатайствуешь и молитвами присными от многих бед и напастей чтущих имя твое сохраняеши. Темже и ныне к предстательству твоему притекающих сохрани, да выну зовем ти сицевая: Радуйся, предстательство верных непостыдное; Радуйся, страждущих изрядный помощниче. Радуйся, милостивый о нас пред Богом ходатаю; Радуйся, Закона Божия твердый ревнителю. Радуйся, молитвы к Богу кадило благовонное; Радуйся, сосуде избранный Святыя Троицы. Радуйся, во вражде сущия, молитвами твоими, премирющий; Радуйся, правоверных миром и любовь ограждающий. Радуйся, праведным житием твоим благочестному жительству научающий; Радуйся, добрых дел присный споспешниче. Радуйся, покаяния добрый учителю; Радуйся, неусыпный о нас молитвенниче. Радуйся, Мино, мучениче многострадальный.

Кондак 6

Проповедник правды Божия, еврей некий, тобою благодетельствованный явися, Мино преславне; той бо видево чудо, имже христианина, сокровища его утаити беззаконно восхотевшаго, обличил еси, отвержеся нечестия своего и веру Христову прием, воспе Богу: Аллилуиа.

Икос 6

Возсия в сердце евреянина онаго свет веры христианския, егда чудно возвратил еси, Мино добропобедне, сокровища его, беззаконно христианином, другом его утаенное: предстательством бо твоим зло во благо обратися; еврей убо крещение христианин же греха прощение получиша. Мы же дивное сие премененне поминающе, от

сердца глаголем ти: Радуйся, зло во благо, молитвами твоими, претворяющий; Радуйся, и злотворящих к покаянию обращающий. Радуйся, страстями ослепленных просветителю; Радуйся, правды Божия твердый ревнителю. Радуйся, пути неблаги предстательством твоим исправляющий; Радуйся, стопы наша к пристанищу закона Господня наставляющий. Радуйся, Церкви Христовы изрядное украшение; Радуйся, рабов Божиих присное поможение. Радуйся, неусыпный о нас молитвенниче; Радуйся, Богоданный в скорбех защитителю. Радуйся, чудес источниче неоскудеваемый; Радуйся, чтущих память твою утешителю благодатный. Радуйся, Мино, мучениче многострадальный.

Кондак 7

Хотяще явити миру источники милости своя неоскудевающия, Христе Боже наш, даровал еси нам предстателей и молитвенников к тебе дерзновенных святых твоих мучеников, иже твердость веры своя, даже до крове пострадавши засвидетельствоваша; В нихже Тя, Единого Благого Бога славяще, умильно зовем Тебе: Аллилуиа.

Икос 7

Новаго Завета благодатию Евангельскою сердце твое насыщая, Мино великомучениче, огнем любви Божественныя Господеви всеожжеглся еси и ликом святых мучеников сочетался еси, с ними же Престолу Вседержителя престоая, молися о чтущих верою память твою, ублажающих песнями тя таковыми: Радуйся, мучениче Господень преславный; радуйся, воине Христов добропобедный. Радуйся, милостивый христианам заступниче; Радуйся, присный о нас молитвенниче. Радуйся, недугов наших целителю милосердый; Радуйся, от напастей многообразных избавителю святой. Радуйся, в борьбе со страстями и прилоги вражьими помощниче сильный; Радуйся, молитвами твоими от падений греховных нас сохраняющий. Радуйся, сокровищнице Даров Божиих Всебогатая; Радуйся, чаше, утешение духовнаго преисполненная. Радуйся, скорби наша молением твоим растворяющий; Радуйся, любовь к Богу сердца наша запаляющий. Радуйся, Мино, мучениче многострадальный.

Кондак 8

Странник на земли явился еси, Мино преславне, сердцем чистым Господа выну взыскующе; темже венец мученический прием, житие твое славно скончал еси; ныне же в Царствии Небеснем водворяся со Ангелы песнь вопиеша Богови: Аллилуиа.

Икос 8

Весь Богови покорився, Мино добропобедне, безвредно море

искушения земнаго прошел еси и в пристанище Божественнаго покоя достиг во Обителях Отца Небеснаго водворяешься. Темже и нас, чтущих память твою, у Престола Божия поминай хвалящих песньми тя сицевымн: Радуйся, образ непорочнаго служения Богу явивый; Радуйся, многих к подвигу исповедания укрепивый. Радуйся, и ныне терпению, житием твоим нас научающий; Радуйся, коегождо к безропотному несению креста его наставляющий. Радуйся, нищеты духовныя учителю совершенный; Радуйся, светом смирения сердца наша просвещающий; Радуйся, православных христиан изрядный поборниче; Радуйся, верным людем от напастей и зол ограждение. Радуйся, присное страждущим поможение; Радуйся, болящим милостивое исцеление. Радуйся, страдальче Христов пречестный; Радуйся, заступниче, от Господа нам дарованный. Радуйся, Мино, мучениче многострадальный.

Кондак 9

Всякую сладость мирскую от души твоя отринул еси, Мучениче Пребогате, темже и честь воинскую оставив, воин Царя Небеснаго явился еси твердостью веры и мужеством праведным просияв. Ныне же на Небесех, Подвигоположник Христу предстои, вопиеша со Ангелы: Аллилуиа.

Икос 9

Ветия многовещанная не возмогут познати силу Христову, еуже яко оружием облеклся еси, Мино преславне, и мучителей беззаконных в терпении твоём победил еси. Мы же сердцем смиренным и душою сокрушенною, подвиг твой восхваляюще, со умилением песни ти зовем таковыя: Радуйся, неправедно страждущих утешение; Радуйся, обидящих вседейственное вразумление. Радуйся, земле благая, плод добродетелей возрастившая; Радуйся, честными твоими страданьями землю Сирийскую осветивший. Радуйся, многая преславная чудеса по смерти твоей явивший; Радуйся, крине святой, посреде идольскаго нечестия процветший. Радуйся, яко злато в горниле скорбей искусивыйся; Радуйся, светом правды Евангельския просиявший. Радуйся, теплыми лучами молитв твоих, притекающая к тебе, согревающий; Радуйся, от нечаемых зол, чтущия тя покрывающий. Радуйся, Святыя Горы Афонския похваление; Радуйся, православным людем присное защищение. Радуйся, Мино, мучениче многострадальный.

Кондак 10

Спасение дивно даровал еси купцу на поклонение к местным твоим мощем идущему; той бо от сребролюбца беззаконнаго смерть претерпе, тобою же воскрешенный, Богу воспе: Аллилуиа.

Икос 10

Стена и заступник теплый явился еси купцу оному, Мино Святе; того бо за злато убиенного воскресив, убийцу неправедного обличил еси; мы же чудо сие поминающе умильно поем ти: Радуйся, чудотворче преславный; Радуйся, предстателю благодатный. Радуйся, злотворящих грозное обличение; Радуйся, чтущих тя, присное защищение. Радуйся, купца убиенного воскресивший; Радуйся, сребролюбца и убийцу к покаянию обративший. Радуйся, жертводателей благий споспешниче; Радуйся, от сердца дающих теплый предстателю. Радуйся, пред иконою твоею смиренно молящихся скорый послушателю; Радуйся, от козней лукаваго и людей злых, верным хранителю. Радуйся, напасти житейския, молением твоим разрушающий; Радуйся, скорби наша, миром духовным растворяющий. Радуйся, Мино, мучениче многострадальный.

Кондак 11

Пение похвальное приносим ти, мучениче доброхвальне, устне сердца смиренного любовию отверзающе: прославляем дивное житие твое и славим мученическую кончину твою, Богу укрепляющему тя зовя: Аллилуиа.

Икос 11

Светом явления чудесе славного, сердце Евтропия, сребролюбием омраченное просветил еси, Святе, той бо блюдо серебряное со именем твоим в дар тебе уготованное помыслив себе оставить, раба возлюбленного и блюдо оное, в пучине морстей потопляема узре; но обаче предстательством твоим спасена раба паки восприим, благодарная ти воспе пения; мы же чудо сие восхваляюще, умильно зовем тебе таковая: Радуйся, сердце Евтропия к покаянию применивший; Радуйся, того раба в пучине морстей сохранивший. Радуйся, явлением чудесе твоего печаль в радость претворивший; Радуйся, слугу верного от потопления спасший. Радуйся, правых сердцем присный споспешниче; Радуйся, о чтущих имя твое к Богу ходатаю. Радуйся, от злых напастей нас сохраняющий; Радуйся, помощь твою, православным людям являющий. Радуйся, правдивому и честному житию научающий; Радуйся, благих начинаний исполнению помогающий. Радуйся, от соблазнов греховных нас ограждающий; Радуйся, прошения наша во благо, ко спасению исполняющий. Радуйся, Мино, мучениче многострадальный.

Кондак 12

Благодать милостиваго твоего заступления, Мино преславне, жена

некая, именем София, позна, та бо шедши в церковь твою на поклонение, тобою от бесчестия воина беззаконного спасшися, благодарно Богови возопи: Аллилуиа.

Икос 12

Поюще многая чудеса твоя, всехвальне великомучениче, поминаем хромого и немую, иже в церкви твоей усердно молишася; тем бо явився, дивным образом исцелил еси; мы же чудо сие поминающе усердно молим тя: и наша, беззаконными многими расслабленная, нози укрепи и устне сердечныя отверзи достойно пети песнями тя сицевыми: Радуйся, нози расслабленного укрепивый; радуйся, узы немаго языка разрешивый. Радуйся, благосердый врачевник многими явивыйся; Радуйся, неверных множество чудесами преславными к вере приведый; Радуйся, боголюбцев веселие и похвале; Радуйся, странных пристанище и утешение. Радуйся, нищих питателю благодатный; Радуйся, вдов и сирот заступлениче непостыдный. Радуйся, правоверным от напастей и зол избавление; радуйся, чтущим тя твердое ограждение. Радуйся, в бедах сущих утешителю благий; Радуйся, в скорбех житейских помощниче святой. Радуйся, Мино, мучениче многострадальный.

Кондак 13

О, святой и преславный великомучениче Христов Мино, прими ныне малое сие, от усердия приносимое ти пение, и покрый молитвами твоими притекающих ко святей иконе твоей и любовью почитающих честную память твою, да предстательством твоим выну от злых покрываемы в мире и благочестии прочее время живота нашего проживем, хваляще дивнаго во святых своих Бога, песнь поюще Ангельскую: Аллилуиа.

(Этот кондак читается трижды, затем икос 1 и кондак 1)